

ւօտը դեռ նոր բացուած՝ հասանք յԵյսք քաղաք, որ ինչպէս Պերտեանսք՝ նոր քաղաք է, այլ ազգայինք ինչպէս աստ նոյնպէս և 'ի Նողայսք ունին եկեղեցի, որոց ժողովուրդը Նախիջևանցոց հատուածներ են: Այս կողմերս գրեթէ ամեն քաղաքաց մէջ կը գտնուին ազգայինք, որք 'ի միասին համրելով, պէտք է լինին 10,000 բաց 'ի Նախիջևանէ: Նոր-Չերքասքի, Ստաւրապոլի, Եկատերնետարի և ապա դէպ 'ի Կասպից ծով՝ Ղզլարի մէջ կան բազմաթիւ Հայք, որ մեծագոյն մասամբ վաճառականութեան կը պարապին: Որովհետեւ Եյսքի նաւամատոյցը քաղաքէն բաւական հեռու չինուած է, և նաւը շատ չի մնար հոն, այն պատճառաւ քաղաք կարող չեղայ գնալու:

Եյսքէ մեկնելով՝ ճիշդ կէսօրին հասայ Ազախու ծովուն հիւսիսային ծայրը, Թայղան կոչուած քաղաքը: Քաղաքիս անունը թաթար նշանակութեամբը՝ սահաժ կամ սպրդաժ կը թարգմանի հայերէն. և յիբաւի, բարձրադիր ցամաքն իբրև թումր՝ կամ լաւ ևս հրուանդան սահաժ իջած է 'ի ծով: Ռուսք Թականրոկ կը կոչեն որ եռանկիւնի-եղջիւր կը նշանակէ: Չկայ ազգային եկեղեցի աստ՝ այլ բաւական հայկազունք կան 'ի քաղաքիս, զորս կը հովուեն Նախիջևանու երիցունք, զի երկաթուղւով երկու ժամուան ճանապարհ է աստի 'ի Նախիջևան:

Թայղանի բնակչաց թիւը 30,000, այլ ինքն առաւել մեծ և փառաւոր քաղաքի երևոյթ ունի, փողոցները լայն և ընդարձակ, երկու կողմը մեծամեծ շէնքերով և ծառաստան ճեմելեօք զարդարուած. սակայն սորա անցեալն աւելի չբեղ է քան ներկայն. մերձաւոր դրացին Դոնեան Ռոստով